



Na partida dals gran emoziuns chëra cuntra i avversars da Prettau. Le gol dla devënta tomé tl'ultim menüt de jüch ti pormët a La Val le balz al secundo post.

Na devënta miritada y de gran importanza por l'andamënt dl campionat chëra dl'ultima sabeda a Prettau. N ciamp prësc striné por i ghesc ladins, che tles ultimes sajuns à msé ji derevers a ciasa scialdi tres a mans ötes. A gauja de tröpes assënzes é i ladins ruvà sön le ciamp in minoranza, la determinaziun de fa bun ne é chësc iade indere nia manciada.

Bele dal mëteman é La Val che detëia le ritm, i sogadus da na pert fej bun só laur y pressëia sön la defenjiun. Ala cherd'ora, tratan le bun momënt por La Val, röia i padruns de ciasa al gol dl vantaje cun na trata dal ciantun indirazada contra l'incrujiada lungia dla porta. Ti proscims 10 menüc ribaltëia i ladins le resultat, plö avisa al 22^a vëgn Franz sorví dala defenjiun y se fej lëde le trú contra porta, le un dl Prettau ne sciafia nia da paré la trata d'estern dl'atacant. Al 26^a gareta la medema combinaziun da denant, Franz controlëia bun le curan y a püc metri dan porta veghel la trata a bót sigü sura le portier ite. Al 35^a é le Prettau che anüza la dijatenziun di ladins por porvé de puniziun de avalué le resultat, le portier Sepl che posizionëia le mür veiga le palé tl'ultim y l'archita.

Le pröm tēmp se stlūj jö sön le 2 a 1 por La Val.

Tla secunda pert é le Prettau che mostra i dēnz, ruvan plö iadi ala contlujiun. Al 65^a ti garetà ai avversars de avalié le resultat cun en önescmetri: Le astüt sogadú amez ciamp se lascia tumé ados al defensur. L'arbiter vëiga dalunc le fal daldöt nia esistēnt y conzed insciö le önescmetri. La protesta da pert di sogadus fej gní l'arbiter nervus che ti osc le spiné ai ladins. La mascima punziun trasformada fej avalié le resultat. La formaziun de Hilber se alza por chirí a dūc i cosc le vantaje, che rōia purmó al ultim menüt de jüch: le palé vëgn arlungé por Samuel che se fej lerch cuntra porta y aspeta cina l'ultim mumēnt por la trata bassa sön le pé lunch de porta. Le chât dl publich de ciasa y le sciür dl'arbiter fej ruvé la partida. Na devēnta esenziala, che fej posizioné la squadra da La Val al secundo post de tlassifica. Le Gais se asigurēia le titul de campion dl rode C a trëi partidas dala fin, por mirit dla devēnta cuntra le Mühlwald. Le campionat se fej ciamó interessant por le secundo post che oress dî rové ales partidas de dezijiun por porvé le salt de categoria.

Prettau – La Val 2-3

Formaziun La Val: 1. Josef Kantioler, 2. Luca Pescollderung (dal 65^a Adrian Miribung), 3. Werner Sottara, 4. Paolo Vallazza, 5. Marco Castlunger, 6. Christian Dapoz, 7. Marco Sottara, 8. Max Nagler, 9. Samuel Winkler (dal 90^a Martin Ploner), 10. Stefan Sottara - capitan, 11. Franz Tolpeit

Goi por La Val: Franz Tolpeit al 22[^] y al 22[^] y Samuel Winkler al 90[^]

Proscima partida: *In domënia ai 14 de mà dales 16:00 a La Val cuntra la squadra da Uttenheim.*

Atri resultac:

Altherren (La Val): La Val – Dietenheim 3-1

Juniores (Val Badia): Val Badia – Ahrntal: 1-5

Allievi (La Val): Vahrn – La Val: 4-1

Giovanissimi (La Val): La Val – Eggental: 0-2

U11 (La Val/San Martin): Obopuschtra Löwen - La Val/San Martin: 2-0

U10 (La Val): Burnech brüm – La Val: 2-0

U8 (La Val)

– torné a Stegen: Stegen – La Val: 2-2

Kiens – La Val: 3-2

Oberpuschtra Tiger – La Val: 5-1